

保赤丹



光緒五年正月
初鐫版于蘇州



保赤彙編序

天地之大德曰生生莫迫于赤子故王政之保息霸圖之饋養先焉夫其春秋巡省救所疾苦雖不言醫醫在其中扁鵲入咸陽見秦人重小兒乃爲小兒醫隨俗變遷故國工無專技小兒稚陽天全利害易應明者心消息之今之君子勤勤于仁術者又何多也積善有慶垂裕後昆以錫麟寶訓爲第一法宜調護造于未形以達生篇爲第二乳保乃育兒之本以產寶爲第三福幼編附焉啞科臆斷貽害滋多以保嬰易知錄爲第四脈微難見雖靈樞素問不具其說以小兒藥證直訣爲第五知識初萌首端志趣閑邪存



誠芳躅可師以呂氏童蒙訓終焉人生強弱之賦根
乎元氣世有壯而折孱而壽者元氣之羸固爲之病
在標雖急易治病在本雖緩難圖醫者意意者理窮
其理究其變縱古無此方而我治之輒效出身利用
原不拘拘于陳編庸醫學淺飲其劑初不加劇久之
纏綿消耗而不起一若病果難療委之數者絕不自
咎因循誤之誤之至于再至于三而求之猶不止垂
縷之命試于淺學之手僥倖于偶中中者幾何兒之
惛惛不能自達其寒熱虛實醫之智識乃與兒同爲
可痛也嗚呼豈獨兒醫爲然哉夫以空疏得售其術
則必以學爲多事古今不學而能惟饑而食寒而衣

耳願人學以待時不可急時名而不學更不可以不
名于時而妄行其學學以爲己推而及物愛之必有
以教之使無慙天地生成之德是故二三君子彙刻
其書屬序于予而予引申其意如此也光緒戊寅涂
月平湖朱之榛



錢仲陽傳

河間劉跂撰

錢乙字仲陽上世錢塘人與吳越王有屬俶納土酋祖贊隨以北因家于鄆父顥善鍼醫然嗜酒喜游一旦匿姓名東游海上不復返乙時三歲母前亡父同產姑嫁醫呂氏哀其孤收養爲子稍長讀書從呂君問醫呂將歿乃告以家世乙號泣請往跡父凡五六返乃得所在又積數歲乃迎以歸是時乙年三十餘鄉人驚嘆感慨爲泣下多賦詩詠其事後七年父以壽終喪葬如禮其事呂君猶事父呂君歿無嗣爲之收葬行服嫁其孤女歲時祭享皆與親等乙始以顥

願方著山東元豐中長公主女有疾召使視之有功
奏授翰林醫學賜緋明年皇子儀國公病瘕痼國醫
未能治長公主朝因言錢乙起草野有異能立召入
進黃土湯而愈神宗皇帝召見褒諭且問黃土所以
愈疾狀乙對曰以土勝水木得其平則風自止且諸
醫所治垂愈小臣適當其愈天子悅其對擢太醫丞
賜紫衣金魚自是戚里貴室逮士庶之家願致之無
虛日其論醫諸老宿莫能持難俄以病免哲宗皇帝
復召宿直禁中久之復辭疾賜告遂不復起乙本有
羸疾性簡易嗜酒疾屢攻自以意治之輒愈最後得
病憊甚乃嘆曰此所謂周痺也周痺入臟者死吾其

已夫已而曰吾能移之使病在末因自製藥日夜飲
之人莫見其方居亡何左手足攣不能用乃喜曰可
矣又使所親登東山視菟絲所生秉火燭其下火滅
處剷之果得茯苓其大如斗因以法噉之閱月而盡
繇此雖偏廢而氣骨堅悍如無疾者退居里舍杜門
不冠履坐卧一榻上時時閱史書雜說客至酌酒劇
談意欲之適則使二僕夫輿之出沒閭巷人或邀致
之不肯往也病者日造門或扶攜襁負纍纍滿前近
自鄰井遠或百數十里皆授之藥致謝而去初長公
主女病泄痢將殆乙方醉曰當發疹而愈駙馬都尉
以爲不然怒責之不對而退明日疹果出尉喜以詩

謝之廣親宗室子病診之曰此可無藥而愈顧其幼
曰此兒旦夕暴病驚人後三日過午無恙其家恚曰
幼何疾醫貪利動人乃如此明日果發癰甚急復召
乙治之三日愈問何以無疾而知曰火急直視心與
肝俱受邪過午者心與肝所用時當更也宗室王子
病嘔泄醫以藥溫之加喘乙曰病本中熱脾且傷柰
何以剛劑燥之將不得前後洩與石膏湯王與醫皆
不信謝罷乙曰毋庸復召我後二日果來召適有故
不時往王疑且怒使人十數輩趣之至曰固石膏湯
證也竟如言而效有士病嗽面青而光其氣哽哽乙
曰肝乘肺此逆候若秋得之可治今春不可治其家

祈哀強之與藥明日曰吾藥再瀉肝而不少卻三補肺而益虛又加脣白法當三日死然安穀者過期不安穀者不及期今尙能粥居五日而絕有娠婦得疾醫言胎且墮乙曰娠者五臟傳養率六旬乃更能候其月偏補之何必墮已而子母皆得全又乳婦因大恐而病病雖愈目張不得瞑人不能曉以問乙乙曰賁郁李酒飲之使醉則愈所以然者目系內連肝膽恐則氣結膽衡不下惟郁李去結隨酒入膽結去膽下目則能瞑矣如言而效一日過所善翁聞兒唬愕曰何等兒聲翁曰吾家孿生二男子乙曰謹視之過百日乃可保翁不憚居月餘皆斃乙爲方博達不名

一師所治種種皆通非但小兒醫也于書無不闕他人
靳靳守古獨度越縱舍卒與法合尤邃本草多識
物理辨正闕誤人或得異藥或持疑事問之必爲言
出生本末物色名貌退而考之皆中末年癯痺浸劇
其嗜酒喜寒食皆不肯禁自診知不可爲召親戚訪
別易衣待盡享年八十二終于家所著書有傷寒論
指微五卷嬰孺論百篇一子早世二孫今現爲醫
劉跂曰乙非獨其醫可稱也其篤行似儒其奇節似
俠術盛行而身隱約又類夫有道者數謂余言曩學
六元五運夜宿東平王冢巔觀氣象至逾月不寐今
老且死事誠有不在書者肯以三十日暇從我當相

授余笑謝弗能是後遂不復言嗚呼斯人也如欲復
得之難哉沒後余聞其所治驗尤眾東州人人能言
之掇其章章者著之篇異時史家序方術之士其將
有攷焉



錫麟寶訓敘

甲寅之歲余手錄戒淫摘要一書將以付梓客有爲
余告者曰古來戒淫書夥矣子猶闡發其說以垂
戒至種子一事當世絕少善書何不取古人戒言
行刊刻布施爲艱於子嗣者勸耶余因博采諸書彙
成一冊題曰錫麟寶訓夫麟仁物也人以仁德感之
天乃以仁物錫之故種子之方必先種德譬之嘉穀
不種何獲其勢然也若夫有子不肖敗行辱身破家
蕩產此皆由先世不知積功累仁所致是不特無子
者宜積德以綿延先澤卽有子者亦宜積德以垂裕
後昆讀麟趾一詩可以悟錫類之故矣或曰是皆有

數在不可強求然果能積德於冥漠之中天心亦自
可轉移矣命何難自我作哉語有之種蘭得香種粟
得糧有志之士可以知所從事焉咸豐四年歲次甲
寅小春月朔日雙榆村人金玉相識



保赤彙編總目

錫麟寶訓四卷

達生編二卷

產寶一卷

附續編
延壽戒期

千金要方

種子說

保身

福幼編一卷

保嬰易知錄二卷

錢氏小兒藥證直訣三卷

附方一卷

童蒙訓三卷



錫麟寶訓摘要卷一

保赤彙編

金玉相勉夫輯

種子格言

種子訣曰萬物莫不有根本試驗諸草木必栽培其根本始能枝葉茂盛花實繁衍此物理也惟人亦然父母者人之本也子與孫猶枝葉花實也枝葉花實之所以茂盛繁衍者皆根本栽培之力厚也非孝無本子孫而不孝是傷其本矣傷其本枝從而亡

冒起宗曰求子之道第一在戒淫行蓋淫爲萬惡首天之降罰最酷每見人家有多娶婢妾生子竟終身無子者有生子已經長成忽又夭死者亦有生子不

肖破家喪身卒至無嗣者皆以淫惡過重故爾殃及子孫誠知血食非輕曷弗早觀淫報

種子說曰人生具此生理仁者天地之心而人之類以生也生理流溢決當有嗣古來求嗣者貴者用其貴富者用其富有言者用其言處處寬人容人愛人救人時時以好生爲心雖年過商瞿無不有子得生生之道也天地爲萬物父母人民者天地之子孫也以愛人利物爲心必能以救人生命爲事是爲天地救子孫也爲天地救子孫而天地不以子孫報之無是理也故積仁未有無子孫者也今有殘忍爲心陰賊爲行好殺爲快淫於色刻於財狷而隘清而刻好

